



Aqqalu C. Jerimiassen

UKA 2020/112

Atassut

05. november 2020

**Illup sananeqarneranut akiusup minnerpaaffissaata 1 inatsisitigut aalajangersarneqartup appartinneratigut pisortat inissiaataanni attartortittakkani ineqarnermut akiliutip appartinneqarnissaanut periarfissat misissoqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinil iluanaarutissaasa aammalu ineqarnermut tapiissutit allanngornerisa imminnut ataqatigiinnerat paasinarsinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni. Kiisalu illup illuutit aserfallassimasut sananeqarneranni naliusup ingerlaavartumik nalikillilerneqartarnerani pitsaaqutit ajoqutillu misissuinikkut qulaajarneqassapput. Misissuinerup inerneril Inatsisartunut kingusinnerpaamik UKA 2021-mi agguanneqassapput.**

(Inatsisartunut ilaasortaq Erik Jensen, Siumut)

Sunaluunniit akikinaarlugu sanaaq annerusumik sivisuumik atasinnanngilaq, akillu minnerpaaffissannut pisortaniik aaliangersaasoqarsinnaanera pissusissamisoorinangu Atassummiik taariiginnarsinnaavarput.

Sammissassalli tikippallaannginnerani siunnersuuteqartumut oqalaarusullunga m<sup>2</sup> pisimagunarmangu saqqummiussisutimini, allaqqasoq malillugu km<sup>2</sup> (Kvadratkilometer) allassimammagu, taamaassimassappallu tamatta illorsualiornissatsinnut akissaqarsinnaassagunaratta taamak akikitsiginiarpat.

Unammilleqatigiinnerup niuffannerullu aporfissalersugaanngitsup akit inississuai, maannali neqeroortitsisarnikkut inissisimanerput kippareruttormata totalentrepriser kisiisa aallaavigalugit ingerlaniartoqalersimammat.

Taanna ajoraluartumik nunani kommunisteqarfiusuni saamerliulluarniartoqarfinnilu planøkonomiimik aqunneqartuni atorneqartarpoq, inuillu atungarissaarsinnaaneringaluannut annertuumik kalluaasarluni. Kiisami ersinarsiinnalerpoq siunissaq ungasinnerusoq isigalugu, tassalimi nunatta ingerlarngani innuttaasut qulaaniik eqiterussilluni aqunniarneqarnerannut suleriesissanik suli saqqummiussaartoqartaruttormat.

Aap, tamatta inuit tamatta iserfissaqarnissarput kialaartumik kissaatingaarput, imaassanngilarli pisortat aqutaannik suna tamarmik inissiar-suarnik Kina-mi 60-ikkunni sanaartorsimanerujussuup assiperaavanik iliorniartoqassasoq.

Inissiarpassuit maanna kataapput, aap ajoraluarpalluunniit sallooqqajannilaq, KATAAPPUT! Sooq taamak inissisimappat? Sooq inissiaatileqatigiiffiup akissaqarfigilluanngisannarpai aserfallatsaalinnissai? Akissut naatsoq tassaasinnaangunarpoq, akigitinneqartoq ataallugu akeqartikkatsigit. Pisortat pigisaattut inissiaatileqatigiiffiit ukiorpassuarni ingerlanneqarneranni akimik naammaqqajanngitsumik akeqartitsisarsimaneq naammaqqajarsimannilaq. Naalagaaffimmiillu inissiat nunatsinit oqartussanit tigueqareermata naalakkersuisuusarsimasut inuiaqatigiinnut naammaginartumik tulluarsakkamillu aaqqissuusseqqittarsimangitsut takuneqarsinnaavoq maana, tassami ukiorpassuarni inissianut attartortakkanut akigitinneqartarsimasut naammaqqajartarsimanninnerujussuini aserfallakkaluttuinnarnerni akissaqarfigineqartarsimannilaq. Maanna akigititaviusut atortittariaqarpagut inissianut attartugassanut, malitsigisaanilli ineqarnermut tapiissutit (boligsikring) malinnaatillugit aaqqiisutissatut inissinniartariaqarlutigit, aatsaat taamaaliornikkut inissiaatileqatigiiffiup akissaqarfeqarsinnaalernissani angujartuaalersinnaavaa.

Siunissaq ungasinnerusooq isigalugu pilersaarummik angisuumik Atassuummiik suliaqartoqarnissaa ornigineruarput, ineqarnikkut sineriak tamaat ajornannginnerusumik inissisimalernissarput pillugu, imatuunngittorli, suna tamaat pisortaniik akisussaaffinngortinnianguassanngorlugu, inuilli namminneq nammineq angerlarsimaffeqalersinnaanissaannut periarfissat nutaat oqinnerusut ilaatigut bankit suleqatigilluarnersigut innuttaasunut tulluuttumik peqarlersinnaammat. Nunanimi allani takusareeqaarput ussassaarutit imaanginnavissut, illusinissamut initaarnissamulluunniit aningaasanik atukkiisarfiit tullerriaaginnaat.

Taamaattorli ineqarneq pillugu oqallinnerit soqutiginaateqartuaannarput, taamaammallu toqqammaviatigut saqqummiusaaq tapersernartippallaanngikkaluarlugu ataatsimiitsitaliamut ingerlateqqaarusupparput.